

# Powšitkowne WOZJEWJENJA

njedźelu, 22. decembra 2019

## Hudźbno-meditaciski nyšpor w swětle swěčkow

W Chróšćanskej cyrkwi wotměje so njedźelu, 22. decembra, w 17.00 hodź. w swětle swěčkow hudźbno-meditaciski adwentny nyšpor. Wšitcy zajimcy su k tomu wutrobnje přeprošeni.

## Koparski turněr

Towarstwo Cyrila a Metoda z.t. (TCM) zarjaduje sobotu, 4. januara, w 15.00 hodź. w Chróšćanskej „Jednoće“ halowy koparski turněr wo pokal TCM. Přeprošene su wosadne a wjesne mustwa młodžiny kaž tež mustwa sportowych jednotkow. Kóžde z nich mělo z wosom hrajerjemi nastupić. Hrač budže so z třomi koparjami a wrotarjom. Přizjewić měli so mustwa hač do soboty, 28. decembra, pola Guida Zahrodnika w Jaseńcy, telefonowe čisło (03 59 33) 3 11 53, mobilnje (01 51) 52 22 17 59.

## Hodowny beneficy nyšpor

Chór Lipa a instrumentalisća wuhotuja njedźelu, 29. hodownika, w 17 hodź. w Róžeńčanskej cyrkwi swój tradicionelny beneficy nyšpor. Zběrka při durjach budže za ambulatnu hospicnu a paliatiwnu poradźowansku službu Hornjołužiskeho zwjazka Charity. Wšitcy lubowarjo hodownych zynkow su přeprošeni.

## Silwester do Baćonja

Silwesterski hudźbny nyšpor z meditacijemi budže wutoru, 31. decembra, w 19 hodź. w Baćonju. Jón wuhotuje podobnje kaž loni młodžina Baćońskeje wosady. Wšitcy su wutrobnje přeprošeni.

## Nowe dźiwadłowe předstajenje Bratrowstwa

Na lětnym swjedženju Kulowskeho Bratrowstwa sobotu, 4. januara, w 19 hodź. w Sulšecach budže premjera noweje žortneje hry „Namrěwstwa dla zawrjene“. Terminy dalších předstajenjow w serbskich wsach so spočatk januara wozjewja.

## Spominanje na fararja Józefa Nowaka

Swjatočna Boža mša składnostnje 125. posmjertnych narodnin fararja Józefa Nowaka budže njedźelu, 5. januara, w 9 hodź. Kemšam přizamknje so počesćenje na kěrchowje. Něhdyši Radworski farar Józef Nowak běše redaktor Katolskeho Posoła a spisowaćel. Towarstwo Cyrila a Metoda a Maćica Serbska wšitkich wutrobnje do Radworja přeprašujetej.

## Hodowny koncert w Chróšćicach

Tradicionelny hodowny koncert Chróšćanskeho cyrkwinskeho chóra wotměje so njedźelu, 5. januara, w 14 hodź. w tamnišej farskej cyrkwi. Nimo skerje znatych hodownych spěwow zaklinča někotre klasiske překwapjenki. Koncert, na kotrymž tež instrumentalisća a młode talenty sobu skutkuja, budže Michał Cyž nawjedować.

## **Hodownej a jubilejnej koncertaj w Radworju**

Swojej hodownej a zdobom jubilejnej koncertaj wuhotuje chór Meja składnostnje swojeho 125lětného wobstaća sobotu, 4. januara, dwójce w Radworskim hosćencu „Meja“. W lětušim programje su hodowne spěwy runje tak zapřijate kaž mnohe „stare“ ze 125lětnych stawiznow chóra. A runje tute nětčiši Mejenjo tónkróć sami njezanjesu. Zdobom móža so přihladowarjo tež na někotre modernje wobdźělane pěsnje, swětoznaty hit a małe filmowe epizody a anekdoty z dołhich mejskich stawiznow wjeselić.

Prěni koncert w swětle swěčkow budže w 15.30 hodź. Swačina so wot 15 hodź. poskići. Dalše předstajenje hodowno-jubilejneho programa budže w 19 hodź. Koncertej přizamknju so reje z kapału CON-TAKT. Wšitcy su wutrobnje do Radworja přeprošeni.

## **Putniska jězba do „Božeje zahrody“ a wokoliny**

Ze Šmitec wozydłownistwom přeprošuju na putniku jězbu wot štwórtka do póndžele, 30. julija do 3. awgusta, do tak mjenowaneje „Božeje zahrody“. W bazilice Vierzeheiligen wobdźělmy so na wulkich putniskich kemšach. Zastanjemy tohorunja w Bayreucie a wopytamy tam mjez druhim synagogu. W Bambergu wobhladamy sej biskopsku cyrkej a město, zeznajemy mošeju a změjemy tež swobodny čas. Nimo toho steja Bad Staffelstein, Lichtenfels a klóšter Banz na programje.

*T. Kubašec*

## **Putniskej jězbje z busom w lěće 2020**

Tež klětu přeprošuju zaso zajimcow na putniskej jězbje. Prěnja powjedže po slědach bamža Jana Pawła II. wot soboty do pjatka, 6. do 12. junija, do susodneje Pólskeje. Wopytamy Wadowice, Zakopane, Częstochowu, Warszawu a Licheń. Dalša putniska jězba budže wot njedžele do soboty, 30. awgusta do 5. septembra. Podamy so do sewjerneje Italskeje ke Gardaskemu jězorej. Mjez druhim wobhladamy sej hnadowne městno „Madonna della Corona“ a dožiwimy předstajenje opery „Aida“ pod hołym njebjom w antiskej arenje we Veronje. Nadrobniše informacije dóstanu zajimcy pod telefonowymaj čisłomaj (01 63) 7 33 82 05 abo (03 57 96) 9 54 28 (po 19 hodź.) abo pola mje w Hórkach, Sydlišćowy puć 2.

*Maćij Hadank*